



# ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ

ք. Երևան

20.06.2022թ.

## Ո Ր Ո Շ ՈՒ Մ

### ՀՀ գնումների հետ կապված բողոքներ քննող անձ թիվ ԳԲՔԱ-ՆԳ-2022/41

Հայաստանի Հանրապետության գնումների հետ կապված բողոքներ քննող անձը՝ ի  
դեմս Գրիգոր Ներսիսյանի՝

Մասնակցությամբ՝

«Մեդէքսպերտ» ՍՊԸ-ի ներկայացուցիչ

Գ. Խաչատրյանի (լիազորագիր՝ տրված 14.06.2022թ.),

քննելով ՀՀ պաշտպանության նախարարության կարիքների համար բժշկական  
արտադրատեսակի ձեռքբերման նպատակով հայտարարված «ՀՀ ՊՆ-ԳՀԱՊՁԲ-22-9/32»  
ծածկագրով գնանշման հարցման ընթացակարգի շրջանակներում «Մեդէքսպերտ» ՍՊԸ-ի  
կողմից 19.05.2022թ. ներկայացված և 20.05.2022թ. վարույթ ընդունված (հետայսու՝  
ԳԲՔԱ-ՆԳ-2022/41 բողոք) և կից փաստաթղթերը, պարզեցի հետևյալը.

**1. «Մեդէքսպերտ» ՍՊԸ-ի կողմից ներկայացված փաստերը, հիմնավորումները և  
պահանջը.**

«Մեդէքսպերտ» ՍՊԸ-ն (հետայսու՝ Ընկերություն) 19.05.2022թ. ներկայացրած բողոքով  
հայտնել է հետևյալը.

«ՀՀ պաշտպանության նախարարությունը բժշկական արտադրատեսակի գնման նպատակով հրապարակել է «ՀՀ ՊՆ-ԳՀԱՊՁԲ-22-9/32» ծածկագրով գնանշման հարցման ընթացակարգ:

14.05.2022թ.-ին Armeps համակարգով ուղարկել ենք հարցում և 17.05.2022թ.-ին ստացվել է պարզաբանում:

Ստորև մեջբերված է մեր հարցումը և ՀՀ ՊՆ պատասխանը:

Հարգելի գնահատող հանձնաժողով

Խնդրում եմ պարզաբանել հետևյալ հարցերը

1. Արդյոք հրապարակված ընթացակարգի տեխնիկական բնութագրին բացի DePuy International Ltd ընկերության արտադրանքից նաև որևէ այլ արտադրողի ապրանք է համապատասխանում:

2. Եթե այո, ապա կոնկրետ որ արտադրողի ապրանքն է համապատասխանում ըստ Ձեզ:

Պարզաբանում N 1՝

«ՀՀ ՊՆ-ԳՀԱՊՁԲ-22-9/32» ծածկագրով ընթացակարգի շրջանակում ստացված հարցման վերաբերյալ հայտնում եմ, որ հրավերով սահմանված տեխնիկական բնութագիրը ներկայացվել է նեղ մասնագետների կողմից՝ հաշվի առնելով տարիների ընթացքում ՀՀ պաշտպանության նախարարության կարիքների համար օգտագործվող ապրանքատեսակը: Տվյալ ապրանքատեսակն արտադրող այլ կազմակերպությունների վերաբերյալ տեղեկատվություն առկա չէ:

Միաժամանակ, հրավերի տեխնիկական բնութագրով սահմանված է, որ կնքվելիք պայմանագրով նախատեսված ապրանքների տեխնիկական բնութագրին համապատասխանող և դրա որևէ բաղադրիչի գծով որակական հատկանիշները գերազանցող ապրանք մատակարարելու դեպքում հնարավոր է ապրանքի ընդունումը, եթե առկա է հայտը նախագծող ներկակացուցչի (ներկայացուցիչների) գրավոր մասնագիտական եզրակացությունը:

2. Բողոքի փաստացի և իրավական հիմքերը

Հրապարակված ընթացակարգի տեխնիկական բնութագիրը կազմված է խտրական, այն ուղղորդված է դեպի մեկ արտադրող և բացառում է մրցակցությունը:

Հրապարակված ընթացակարգի տեխնիկական բնութագրին համապատասխանում է միայն DePuy International Ltd ընկերության արտադրանքը:

ՀՀ ՊՆ կողմից տրված պարզաբանման մեջ նույնպես նշված է, որ տվյալ ապրանքատեսակն արտադրող այլ կազմակերպությունների վերաբերյալ տեղեկատվություն առկա չէ:

Փաստացի հրապարակված ընթացակարգի տեխնիկական բնութագրին համապատասխանում է մեկ արտադրող, ինչը հակասում է ՀՀ կառավարության 04 մայիսի 2017թ. թիվ 526-Ն որոշմամբ հաստատված Կարգի 22-րդ կետով սահմանված հետևյալ պահանջին.

«22. Գնման առարկայի բնութագրերը սահմանելիս պետք է հաշվի առնել, որ դրանց պետք է բավարարեն մեկից ավելի հնարավոր մասնակիցներ և արտադրողներ՝ բացառությամբ գնումը սույն կարգի 23-րդ կետի 4-րդ ենթակետով նախատեսված հիմքով կատարելու դեպքերի»:

Ամփոփելով վերոգրյալը Ընկերությունը խնդրել է պարտավորեցնել «ՀՀ ՊՆ-ԳՀԱՊՁԲ-22-9/32» ծածկագրով գնանշման հարցման ընթացակարգի գնահատող հանձնաժողովին չկայացած հայտարարելու «ՀՀ ՊՆ-ԳՀԱՊՁԲ-22-9/32» ծածկագրով գնանշման հարցման ընթացակարգը:

Այնուհետև՝ 14.06.2022թ. ներկայացված դիրքորոշմամբ Ընկերությունը հայտնել է հետևյալը.

«Ի պատասխան Ձեր աշխատակազմի կողմից 10.06.2022թ. ուղարկված ՊՆ դիրքորոշման հայտնում եմ հետևյալը

ՀՀ ՊՆ-ն թե պարզաբանման հարցման փուլում, թե մեր բողոքին ի պատասխան ուղարկված գրության մեջ խոստովանում է, որ նկարագրել է հենց DePuy International Ltd ընկերության արտադրանքը: Բացի այդ, ՀՀ ՊՆ-ն հայտնել է, որ տվյալ ապրանքատեսակն արտադրող այլ կազմակերպությունների վերաբերյալ տեղեկատվություն առկա չէ:

Այս ամենը ՀՀ ՊՆ-ն «հիմնավորում» է գնման առարկայի կենսական նշանակությամբ, նյարդավիրաբույժների տարիների փորձով, հնարավոր բարդությունների կանխելու և առողջության անվտանգությունն ապահովելու նպատակով, իսկ վերջում էլ մեջբերել է Գնումների մասին ՀՀ օրենքի 13 հոդվածի 2 կետի 3 ենթակետը, դրանից առաջ չհիշելով 1 և 2 ենթակետերը:

Հայտնում ենք Ձեզ, որ ՀՀ ՊՆ կարիքների, այն է՝ ողնաշարի կոտրվածքների և այլ պատճառներով առաջացած ողերի դեֆեկտների վերականգնման համար աշխարհում

գոյություն ունեն բազմաթիվ արտադրողներ, այդ թվում եվրոպական, այսինքն տեխնիկական բնութագիրը կարելի էր գրել այնպես, որ դրան համապատասխաներ առնվազը երկու արտադրող, սակայն ՀՀ ՊՆ աշխատակիցները դրա փոխարեն միտումնավոր այնպես են կազմել տեխնիկական բնութագիրը, որ դրան համապատասխանի միայն DePuy International Ltd ընկերության արտադրանքը:

Փաստացի ՀՀ ՊՆ-ն փոխել է մարտավարությունը և այլևս չի ձգտում ապացուցել, որ աշխարհում գոյություն ունեն իրենց բնութագրին համապատասխանող առնվազը երկու արտադրող: Դրա փոխարեն ՀՀ ՊՆ-ն որոշել է նկարագրել կոնկրետ ապրանք, հայտարարելով որ հենց այդ ապրանքն է միայն իր կարիքը բավարարում, մոռանալով որ կարիքը բավարարելը անհրաժեշտ պայման է, բայց ոչ բավարար, այսինքն տեխնիկական բնութագրով պահանջվող ապրանքը ոչ միայն պետք է բավարարի ՀՀ ՊՆ կարիքներին, այլ դրան պետք է նաև համապատասխանի առնվազը երկու արտադրող: Փաստացի ՀՀ ՊՆ-ն միայն ներկայացնում է ապրանքի՝ իր կարիքներին բավարարելու հատվածը, իսկ նվազագույնը երկու արտադրողի համապատասխանելու պահանջը չի կատարում: Սա անթույլատրելի է և հակասում է ՀՀ կառավարության 04 մայիսի 2017թ. թիվ 526-Ն որոշմամբ հաստատված Կարգի 22-րդ կետով սահմանված պահանջին:

ՀՀ ՊՆ տրամաբանությամբ եթե շարժվենք, ապա բոլոր ՀՀ պատվիրատուները իրավունք պետք է ունենան նկարագրելու կոնկրետ ապրանք իրենց հայեցողությամբ, որին միայն մեկ արտադրող է համապատասխանում, և բնականաբար բոլորն էլ իրենց «խիստ հիմնավոր» պատճառաբանությունները կբերեն, թե ինչու են ընտրել հենց այդ ապրանքը, ընդ որում այդ հիմնավորումների մեջ հատուկ կերպով բերվելու են բողոք քննող անձի վրա հոգեբանական ներգործություն թողնող առանցքային բառեր և արտահայտություններ, ինչպիսիք են «անդառնալի կորուստներից խուսափելու», «անհետաձգելի վիրաբուժական միջամտություններ», «առողջության անվտանգության ապահովում», «հնարավոր բարդությունների կանխում» և այլն, որոնք կարդացողի մոտ անշուշտ առնվազն կասկած կսահմանեն հնարավոր ռիսկերի վերաբերյալ:

Իրականում բոլոր այս հիմնավորումները նպատակ են հետապնդում քողարկել ՀՀ ՊՆ կողմից ոչ մրցակցային սկզբունքով, ուղղորդված բնութագրով կոնկրետ ապրանքատեսակի ձեռք բերելու մղումը: Եթե ՀՀ ՊՆ փորձառու նյարդավիրաբույժներից որևէ մեկը կարող է իր դիրքորոշումը հիմնավորել բողոքի առցանց քննության նիստին,

ապա մեր ընկերությունը պատրաստ է ներկայացնել համապատասխան հակափաստարկներ:

Եթե ՀՀ ՊՆ ներկայացուցիչները չեն կարողանում կազմել այնպիսի բնութագիր, որը կհամապատասխանի ՀՀ կառավարության 04 մայիսի 2017թ. թիվ 526-Ն որոշմամբ հաստատված Կարգի 22-րդ կետով սահմանված պահանջին, այսինքն չեն կարողանում նկարագրել այնպիսի ապրանք, որը միաժամանակ կբավարարի ՀՀ ՊՆ կարիքները և միաժամանակ դրան կհամապատասխանի առնվազն երկու արտադրող, ապա մեր ընկերությունը պատրաստ է անվճար տրամադրել խորհրդատվություն:

Ելնելով վերոգրյալից, պնդում ենք մեր բողոքն ամբողջությամբ՝ պարտավորեցնել «ՀՀ ՊՆ-ԳՀԱՊՁԲ-22-9/32» ծածկագրով գնանշման ընթացակարգի գնահատող հանձնաժողովին չկայացած հայտարարել «ՀՀ ՊՆ-ԳՀԱՊՁԲ-22-9/32» ծածկագրով գնանշման ընթացակարգը»:

Ընկերությունը, պատշաճ ծանուցված լինելով բողոքի քննության նպատակով 15.06.2022թ. ժամը 10:00-ին հրավիրված նիստի վերաբերյալ, ապահովել է իր ներկայացուցչի մասնակցությունը, ով իր հերթին պնդել է վերը շարադրված բողոքը:

## **2. ՀՀ պաշտպանության նախարարության կողմից բողոքի վերաբերյալ ներկայացված դիրքորոշումը և հիմնավորումները.**

ՀՀ պաշտպանության նախարարությունը (հետայսու նաև՝ Պատվիրատու) Գնումների հետ կապված բողոքներ քննող անձին ուղղված 02.06.2022թ. թիվ ՊՆ/02/2636-2022 գրությամբ, բողոքի վերաբերյալ հայտնել է հետևյալ դիրքորոշումը.

««ՀՀ ՊՆ-ԳՀԱՊՁԲ-22-9/32» ծածկագրով ընթացակարգի շրջանակում «Մեդէքսպերտ» ՍՊ ընկերության կողմից թիվ ԳԲԲԱ-ՆԳ-2022/41 ծածկագրով բողոքի վերաբերյալ ներկայացնում են Պատվիրատուի դիրքորոշումը.

Մրցույթի հրավերի տեխնիկական բնութագրում առկա ապրանքը նախատեսված է կիրառելու ողնաշարի կոտրվածքների և այլ պատճառներով առաջացած ողերիդեֆեկտների վերականգնման համար: Հաշվի առնելով գնվող առարկայի կենսական նշանակությունը և նյարդավիրաբույժների տարիների փորձը՝ հիմք ընդունելով «Գնումների մասին» ՀՀ օրենքի 13-րդ հոդվածի 2-րդ կետի 3-րդ ենթակետը, այն է՝ «Գնման առարկայի բնութագրերը՝ 3) պետք է լինեն օբյեկտիվորեն հիմնավորված և

համարժեք լինեն այն կարիքին, որի բավարարման նպատակով կատարվում է տվյալ գնումը», հնարավոր բարդությունների կանխման և առողջության անվտանգության ապահովման նպատակով ՀՀ ԶՈՒ ռազմաբժշկական վարչությունը նկարագրել է հենց վերոհիշյալ ապրանքատեսակը»:

Պատվիրատուն, պատշաճ ծանուցված լինելով բողոքի քննության նպատակով 15.06.2022թ. ժամը 10:00-ին հրավիրված նիստի վերաբերյալ, չի ապահովել իր ներկայացուցչի մասնակցությունը, ովքեր իրենց հերթին պնդել են վերը շարադրված դիրքորոշումը:

**3. ԳԲՔԱ-ՆԳ-2022/41 բողոքի քննության համար էական նշանակություն ունեցող փաստերը.**

ԳԲՔԱ-ՆԳ-2022/41 բողոքի քննության համար էական նշանակություն ունեն հետևյալ փաստերը՝

1. ՀՀ պաշտպանության նախարարության կարիքների համար բժշկական արտադրատեսակի ձեռքբերման նպատակով հայտարարվել է «ՀՀ ՊՆ-ԳՀԱՊՁԲ-22-9/32» ծածկագրով գնանշման հարցման ընթացակարգ (հետայսու նաև՝ Ընթացակարգ):

2. Ընթացակարգի հրավերի հավելված 1-ով՝ Տեխնիկական բնութագրով սահմանվել է հետևյալը.

Զ/հ	Անվանումը	Տեխնիկական հատկանիշը
1.	Կիֆոպլաստիկայի համար նախատեսված բարձր խտության ցեմենտ, խառնման և ներարկման հիդրավլիկ համակարգով	Կիֆոպլաստիկայի, վերտեբրոպլաստիկայի համար նախատեսված բարձր խտության ցեմենտ՝ խառնող և տեղ հասցնելու համակարգով, մեկ հավաքում: Բարձր խտության ոսկրային ցեմենտը պետք է պարունակի 20 գրամից ոչ պակաս փոշի բաղադրամաս, կազմված՝ մեթիլմետակրիլատից 18,3- 19%, մեթիլակրիլատի և մեթիլմետակրիլատի սոպոլիմերից 50,8- 51,5%, բենզոլի պերօքսիդից 0,5-0,7 %, բարիումի սուլֆատից 29,8-30% նախատեսված օստեոպորոզների, ուռուցքների, տրավմանների հետևանքով առաջացած կոմպրեսիոն կոտրվածքների բուժման համար: Հեղուկ կոմպոնենտի 97-98% պետք է կազմված լինի մեթիլմետակրիլատից: Ներարկման ժամանակը 8-10 րոպե՝ վիրահատարանի 20 աստիճան C ջերմաստիճանի դեպքում: Ցեմենտի ծավալը 10,0 մլ ից ոչ պակաս: Վիրահատական տեխնիկան պետք է հարմարեցված լինի խառնումից անմիջապես հետո ներարկում կատարելուն, որպեսզի առավելագույն չափով կրճատվի միջամտության ժամանակը: Խառնման համակարգը իրենից պետք է ներկայացնի պլաստիկ թաս՝ իր կափարիչով, որի վրա տեղադրված է պտտման բռնակը դրսի կողմից և երկու գլանակներ ներսի կողմից, որոնք ծառայում են ցեմենտի խառնմանը: Ցեմենտի ներարկման հիդրավլիկ համակարգը պետք է կազմված լինի պլաստիկ պոմպից, ստերիլ հեղուկով ներսում, ճնշում առաջացնող մխոցով և էրգոնոմիկ բռնակով, որը թույլ կտա դուրս մղել պոմպից 0,3մմ ջուր՝ մեկ պտույտի դեպքում, ցեմենտի համար նախատեսված թափանցիկ տարայից, որի ներսում պետք է լինի մխոց՝ պլաստիկ

	<p>կափարիչով: Տարան պետք է ունենա աստիճանասանդղակ 0-10մմ՝ 1մլ քայլով: Երկու սարքերը պետք է իրար միմյան 6կուն խողովակով: Պետք է լինի ողի մարմնի մեջ ասեղների մտցնելու համար նախատեսված մուրճ՝ 150գր, պլաստիկ պոչով՝ 270մմ ից ոչ պակաս 290 մմ ից ոչ ավել: Պլաստիկ ասեղաբռնիչ՝ ասեղի ամրացման համար կցորդիչով: Երկու հատ 13G 100մմ ից ոչ պակաս երկարությամբ քառանկյուն ծայրով ուղեկցող ասեղներ: Մեկ հատ բիոպսիոն ասեղ 15G՝ երկարությունը 230մմ ից ոչ պակաս:</p>
--	--

3. Ընթացակարգի շրջանակներում «Մեդէքսպերտ» ՍՊԸ-ի կողմից 19.05.2022թ. ներկայացվել է բողոք, որով վերջինս վիճարկել է հրավերի պահանջ և խնդրել չկայացած հայտարարել «ՀՀ ՊՆ-ԳՀԱՊՁԲ-22-9/32» ծածկագրով գնանշման ընթացակարգը:

**4. ՀՀ գնումների հետ կապված բողոքներ քննող անձի հիմնավորումները և եզրահանգումը.**

ՀՀ գնումների հետ կապված բողոքներ քննող անձ Գրիգոր Ներսիսյանս, ուսումնասիրելով «Մեդէքսպերտ» ՍՊԸ-ի կողմից ներկայացված բողոքը, ՀՀ պաշտպանության նախարարության դիրքորոշումը՝ կից փաստաթղթերով, «ՀՀ ՊՆ-ԳՀԱՊՁԲ-22-9/32» ծածկագրով ընթացակարգի հրավերը, հայտնում եմ հետևյալը.

«Գնումների մասին» ՀՀ օրենքի (հետայսու նաև՝ Օրենք) 3-րդ հոդվածի համաձայն՝

1. Սույն օրենքի նպատակն է ապահովել գնումների գործընթացում հատուցման դիմաց արժեք, այն է՝

1) պատվիրատուին վերապահված լիազորությունների կատարման համար անհրաժեշտ՝ կարիքին համապատասխան ապրանքների, աշխատանքների և ծառայությունների ձեռքբերում՝ համարժեք հատուցմամբ.

2) գնումների և գնումների գործընթացի տնտեսող, արդյունավետ և օգտավետ իրականացում:

2. Գնումների գործընթացը հիմնվում է հետևյալ սկզբունքների վրա.

1) գնման գործընթացի միասնական կանոններով մրցակցային, թափանցիկ, համաչափ, հրապարակային և ոչ խտրական հիմունքներով կազմակերպում.

2) պայմանագրի կնքման նպատակով մասնակիցների շրջանակի ընդլայնում և նրանց միջև մրցակցության խրախուսում.

3) ցանկացած անձի համար, անկախ նրա օտարերկրյա ֆիզիկական անձ, կազմակերպություն կամ քաղաքացիություն չունեցող անձ լինելու հանգամանքից, գնման գործընթացին մասնակցելու իրավահավասարություն:

(...):

Օրենքի 13-րդ հոդվածի համաձայն՝

1. Գնման առարկայի բնութագրերը պետք է ամբողջությամբ և հստակ նկարագրեն ձեռք բերվող ապրանքի, աշխատանքի կամ ծառայության հատկանիշները, դրանց ձեռքբերման և վճարման պայմանները՝ բացառելով տարակերպ մեկնաբանությունը: Գնման առարկայի բնութագրերը, որոնք ներառում են նաև պայմանագրի գինը, ընդգրկվում են պայմանագրում:

2. Գնման առարկայի բնութագրերը՝

1) պետք է մրցակցության հավասար պայմաններ ապահովեն հնարավոր մասնակիցների համար.

2) չպետք է հանգեցնեն գնումների գործընթացում մրցակցության համար չհիմնավորված խոչընդոտների առաջացմանը.

3) պետք է լինեն օբյեկտիվորեն հիմնավորված և համարժեք լինեն այն կարիքին, որի բավարարման նպատակով կատարվում է տվյալ գնումը.

4) ներառում են գնման առարկայի մասնագրի, տեխնիկական տվյալների, իսկ աշխատանքների դեպքում՝ նաև աշխատանքների ծավալաթերթի, ժամանակացույցի և այլ ոչ գնային պայմանների ամբողջական և համարժեք նկարագրությունը:

3. **Ելնելով գնման առարկայի առանձնահատկությունից՝ դրանց հատկանիշները հնարավորինս ներառում են ձեռք բերվող ապրանքի, աշխատանքի կամ ծառայության որակին, սրանդարտին, անվանագույանը, պայմանական նշաններին, տերմինաբանությանը, փաթեթավորմանը, բեռնաթափմանը, չափին, նախագծերին, ինչպես նաև գնման առարկայի այլ հատկանիշներին վերաբերող պայմանների հստակ նկարագրությունը՝ հիմնված միջազգային սրանդարտների և Հայաստանի Հանրապետությունում գործող նորմատիվադեֆինիցիական փաստաթղթերի, սրանդարտների, իսկ դրանց բացակայության դեպքում՝ ժամանակավոր դեֆինիցիական պայմանների վրա:**

4. Գնման առարկայի հատկանիշները կարող են սահմանվել նաև որպես կատարողականի կամ գործառությանին (ֆունկցիոնալ) նկարագրեր, որոնք պետք է



ներկայացվեն բավարար ճշտությամբ՝ հնարավորություն տալով մասնակիցներին և պատվիրատուին ճշգրիտ ընկալել պայմանագրի առարկան:

Օրենքի 29-րդ հոդվածի համաձայն՝

(...)

4. **Հայտերի ներկայացման վերջնաժամկետը լրանալուց առնվազն հինգ օրացուցային օր առաջ հրավերում կարող են կատարվել փոփոխություններ:** Բաց մրցույթի դեպքում փոփոխություն կատարելու օրվան հաջորդող երեք օրացուցային օրվա ընթացքում փոփոխություն կատարելու և դրանք տրամադրելու պայմանների մասին հայտարարություն է հրապարակվում տեղեկագրում, իսկ փակ մրցույթի դեպքում փոփոխությունները տրամադրվում են հրավեր ստացած մասնակիցներին:

5. Բաց մրցույթի հրավերում փոփոխություններ կատարվելու դեպքում հայտերը ներկայացնելու վերջնաժամկետը հաշվվում է այդ փոփոխությունների մասին տեղեկագրում հայտարարության հրապարակման օրվանից, իսկ փակ մրցույթի դեպքում՝ հրավերում կատարված փոփոխությունները հրավեր ստացած մասնակիցներին տրամադրվելու օրվանից:

Օրենքի 50-րդ հոդվածի 7-րդ մասի 1-ին կետի համաձայն՝ Գնումների հետ կապված բողոքներ քննող անձն իրավունք ունի պատվիրատուի և գնահատող հանձնաժողովի գործողությունների կամ անգործության վերաբերյալ ընդունելու հետևյալ որոշումները.

ա. արգելելու կատարել որոշակի գործողություններ և ընդունել որոշումներ,

բ. պարտավորեցնելու ընդունել համապատասխան որոշումներ, ներառյալ՝ չկայացած հայտարարելու գնման ընթացակարգը, բացառությամբ պայմանագիրը անվավեր ճանաչելու մասին որոշման:

ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի (հետայսու նաև՝ Կարգ) 22-րդ կետի համաձայն՝ գնման առարկայի բնութագրերը և մասնակիցների որակավորման հատկանիշների գնահատմանը ներկայացվող չափանիշները սահմանելիս պետք է հաշվի առնել, որ դրանց պետք է բավարարեն մեկից ավելի հնարավոր մասնակիցներ և արտադրողներ՝ բացառությամբ օրենքի 23-րդ հոդվածի 1-ին մասի 1-ին կետով նախատեսված պայմաններով գնում կատարելու դեպքերի:

Այսպես, ՀՀ պաշտպանության նախարարության կարիքների համար բժշկական արտադրատեսակի ձեռքբերման նպատակով հայտարարվել է «ՀՀ ՊՆ-ԳՀԱՊՁԲ-22-9/32»

ծածկագրով գնանշման հարցման ընթացակարգ:

Ընթացակարգի հրավերի հավելված 1-ով՝ Տեխնիկական բնութագրով սահմանվել է հետևյալը.

Զ/հ	Անվանումը	Տեխնիկական հատկանիշը
2.	Կիֆոպլաստիկայի համար նախատեսված բարձր խտության ցեմենտ, խառնման և ներարկման հիդրավլիկ համակարգով	Կիֆոպլաստիկայի, վերտեբրոպլաստիկայի համար նախատեսված բարձր խտության ցեմենտ՝ խառնող և տեղ հասցնել համակարգով, մեկ հավաքում: Բարձր խտության ոսկրային ցեմենտը պետք է պարունակի 20 գրամից ոչ պակաս փոշի բաղադրամաս, կազմված՝ մեթիլմետակրիլատից 18,3- 19%, մեթիլակրիլատի և մեթիլմետակրիլատի սոպոլիմերից 50,8- 51,5%, բենզոլի պերօքսիդից 0,5-0,7 %, բարիումի սուլֆատից 29,8-30% նախատեսված օստեոպորոզների, ուռուցքների, տրավմաների հետևանքով առաջացած կոմպրեսիոն կոտրվածքների բուժման համար: Հեղուկ կոմպոնենտի 97-98% պետք է կազմված լինի մեթիլմետակրիլատից: Ներարկման ժամանակը 8-10 րոպե՝ վիրահատարանի 20 աստիճան C ջերմաստիճանի դեպքում: Ցեմենտի ծավալը 10,0 մլ ից ոչ պակաս: Վիրահատական տեխնիկան պետք է հարմարեցված լինի խառնումից անմիջապես հետո ներարկում կատարելուն, որպեսզի առավելագույն չափով կրճատվի միջամտության ժամանակը: Խառնման համակարգը իրենից պետք է ներկայացնի պլաստիկ թաս՝ իր կափարիչով, որի վրա տեղադրված է պտտման բռնակը դրսի կողմից և երկու գլանակներ ներսի կողմից, որոնք ծառայում են ցեմենտի խառնմանը: Ցեմենտի ներարկման հիդրավլիկ համակարգը պետք է կազմված լինի պլաստիկ պոմպից, ստերիլ հեղուկով ներսում, ճնշում առաջացնող մխոցով և էրգոնոմիկ բռնակով, որը թույլ կտա դուրս մղել պոմպից 0,3մմ ջուր՝ մեկ պտույտի դեպքում, ցեմենտի համար նախատեսված թափանցիկ տարայից, որի ներսում պետք է լինի մխոց՝ պլաստիկ կափարիչով: Տարան պետք է ունենա աստիճանասանդղակ 0-10մմ՝ 1մլ քայլով: Երկու սարքերը պետք է իրար միանան ճկուն խողովակով: Պետք է լինի ողի մարմնի մեջ ասեղների մտցնելու համար նախատեսված մուրճ՝ 150գր, պլաստիկ պոչով՝ 270մմ ից ոչ պակաս 290 մմ ից ոչ ավել: Պլաստիկ ասեղաբռնիչ՝ ասեղի ամրացման համար կցորդիչով: Երկու հատ 13G 100մմ ից ոչ պակաս երկարությամբ քառանկյուն ծայրով ուղեկցող ասեղներ: Մեկ հատ բիոպսիոն ասեղ 15G՝ երկարությունը 230մմ ից ոչ պակաս:

Ընթացակարգի շրջանակներում «Մեդէքսպերտ» ՍՊԸ-ի կողմից 19.05.2022թ. ներկայացվել է բողոք, որով վերջինս վիճարկել է հրավերի պահանջ և խնդրել չկայացած հայտարարել «ՀՀ ՊՆ-ԳՀԱՊՁԲ-22-9/32» ծածկագրով գնանշման ընթացակարգը:

Այսպիսով՝ «Մեդէքսպերտ» ՍՊԸ-ն ներկայացված բողոքով հայտնել է, որ հրապարակված ընթացակարգի տեխնիկական բնութագիրը կազմված է խտրական, այն ուղղորդված է դեպի մեկ արտադրող և բացառում է մրցակցությունը՝ վկայակոչելով Կարգի 22-րդ կետով սահմանված պահանջը, այն է՝ գնման առարկայի բնութագրերը սահմանելիս պետք է հաշվի առնել, որ դրանց պետք է բավարարեն մեկից ավելի հնարավոր մասնակիցներ և արտադրողներ և խնդրել չկայացած հայտարարել «ՀՀ ՊՆ-ԳՀԱՊՁԲ-22-9/32» ծածկագրով գնանշման ընթացակարգը:

Բողոքի փաստական հիմքերի ուսումնասիրության արդյունքում պարզ է դառնում, որ Ընկերությունը վիճարկում է հրավերի պահանջ, մասնավորապես՝ Ընկերությունը նշել է, որ տեխնիկական բնութագիրը կազմված է խտրական, այսինքն՝ կարելի է ենթադրել, որ բողոքն ուղղված է Ընկերության հնարավոր մասնակցության խախտված իրավունքի վերականգնմանը:

Հետևաբար՝ նման պայմաններում անհասկանալի է բողոքով ներկայացված պահանջը, այն է՝ չկայացած հայտարարել «ՀՀ ՊՆ-ԳՀԱՊՁԲ-22-9/32» ծածկագրով գնանշման ընթացակարգը, այն դեպքում, երբ գնումների մասին ՀՀ օրենսդրությունը նախատեսում է նաև հրավերում փոփոխություն կատարելու հնարավորություն:

Ավելին՝ Օրենքի 50-րդ հոդվածի 7-րդ մասի 1-ին կետի համաձայն՝ Գնումների հետ կապված բողոքներ քննող անձն իրավունք ունի կայացնել այնպիսի որոշում, որով կպարտավորեցնի գնահատող հանձնաժողովին ընդունել համապատասխան որոշում:

Օրենքի 29-րդ հոդվածի 4-րդ մասի համաձայն՝ հայտերի ներկայացման վերջնաժամկետը լրանալուց առնվազն հինգ օրացուցային օր առաջ հրավերում կարող են կատարվել փոփոխություններ: Բաց մրցույթի դեպքում փոփոխություն կատարելու օրվան հաջորդող երեք օրացուցային օրվա ընթացքում փոփոխություն կատարելու և դրանք տրամադրելու պայմանների մասին հայտարարություն է հրապարակվում տեղեկագրում, իսկ փակ մրցույթի դեպքում փոփոխությունները տրամադրվում են հրավեր ստացած մասնակիցներին:

Կարգի 32-րդ կետի 25-րդ ենթակետի համաձայն՝ հրավերով նախատեսվում է նաև, որ յուրաքանչյուր ոք իրավունք ունի մինչև հրավերում փոփոխությունների կատարման համար սահմանված վերջնաժամկետը լրանալը, էլեկտրոնային փոստի միջոցով գնահատող հանձնաժողովի քարտուղարին ներկայացնել հիմնավորումներ հրավերով սահմանված գնման առարկայի բնութագրերի՝ օրենքով նախատեսված մրցակցության ապահովման և խտրականության բացառման պահանջների տեսակետից՝ առանց նշելու անունը-ազգանունը: Ներկայացված հիմնավորումներն ընդունելի համարվելու դեպքում գնահատող հանձնաժողովը սահմանված ժամկետում դրանցով պայմանավորված փոփոխություններ է կատարում հրավերում:

Այսինքն՝ «Մեղէքսպերտ» ՍՊԸ-ն ոչ միայն չի իրացրել գնումների մասին ՀՀ օրենսդրությամբ իրեն վերապահված հրավերում փոփոխություն կատարելու վերաբերյալ հիմնավորված պահանջ Պատվիրատուին ներկայացնելու իրավունքը, այլ նաև բողոքով

ներկայացրել է պահանջ Ընթացակարգը չկայացած հայտարարելու վերաբերյալ, մինչդեռ նույն օրենսդրությամբ Ընկերության վերապահված է եղել իրավունք ներկայացնելու հրավերում փոփոխություն կատարելու պահանջ, որը վերջինիս կողմից նույնպես չի իրացվել:

Այսպիսով՝ հարկ եմ համարում արձանագրել, որ բողոքով ներկայացված պահանջի բավարարելը չի կարող հանգեցնել բողոքով բարձրացված խնդրի լուծմանը, այն է՝ Ընկերության հնարավոր մասնակցության ենթադրյալ խախտված իրավունքի վերականգնմանը, քանի որ ենթադրյալ խախտված իրավունքի վերականգնման, այն է՝ մասնակցության իրավունքն իրացնելու նպատակով Ընկերությունը կարող էր բողոքով ներկայացնել այնպիսի պահանջ, որը բավարարելու դեպքում Գնումների հետ կապված բողոքներ քննող անձը կարող էր պարտավորեցնել Ընթացակարգի գնահատող հանձնաժողովին հրավերում կատարել փոփոխություն:

Վերը շարադրված փաստական հանգամանքների ուժով՝ Գնումների հետ կապված բողոքներ քննող անձը գալիս է այն եզրահանգման, որ Ընկերությունը ներկայացված բողոքով նպատակ է հետապնդում, ոչ թե վերականգնել իր ենթադրյալ խախտված իրավունքները, այլ ընդամենն Ընթացակարգը չկայացած հայտարարելով խաթարել Պատվիրատուի բնականոն աշխատանքը:

Այսինքն՝ գնումների գործընթացի բողոքարկումը չպետք է լինի ինքնանպատակ և գնումների գործընթացի անհարկի հետաձգման պատճառ հանդիսանա: Պետական գնումների անհրաժեշտությունը ուղղված է «Գնումների մասին» ՀՀ օրենքով նախատեսված պատվիրատու հանդիսացող մարմինների գործառույթների պատշաճ իրականացմանը, և այդ գործընթացների անհարկի հետաձգումները կարող են արհեստական խոչընդոտներ ստեղծել նշված մարմինների բնականոն գործունեության համար:

Հաշվի առնելով վերոգրյալը՝ գտնում եմ, որ «Մեդէքսպերտ» ՍՊԸ-ի կողմից 19.05.2022թ. բողոքով ներկայացված պահանջը հիմնավորված չէ և ենթակա է մերժման:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասով՝

## **Ո Ր Ո Շ Ե Ց Ի**

«Մեդէքսպերտ» ՍՊԸ-ի կողմից 19.05.2022թ. ներկայացված բողոքը մերժել:

ՀՀ գնումների հետ կապված բողոքներ քննող անձի որոշումն իրավապարտադիր է և ուժի մեջ է մտնում տեղեկագրում հրապարակվելու հաջորդ օրը:

ՀՀ գնումների հետ կապված բողոքներ քննող անձի որոշումը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

**Գնումների հետ կապված  
բողոքներ քննող անձ՝**



**ԳՐԻԳՈՐ ՆԵՐՍԻՍՅԱՆ**